

Segun ex-minister plenipotenciario, Guilfred Besaril, no tin igualdad den tratamiento di caso Tulipan

Diaranson mainta den Corte di Prome Instancia di Aruba a tuma luga e audiencia preliminar (regiezitting) di e caso penal Tulipan den cual ex-minister plenipotenciario, Guilfred Besaril ta ser sospecha di usa fondonan di pueblo pa uso personal durante su periodo como minister Plenipotenciario na Hulanda.

Segun e noticiero local Noticia Cla a reporta, durante e audiencia preliminar Besaril a expresa cu e base di su caso mester ta basa riba igualdad di trato y e maneho presupuestario hiba durante su periodo como minister plenipotenciario na Hulanda.

Besaril, ken tabata desempeña e trabou di agente policial pa hopi tempo, a splica den corte cu e ta un homber di ley y cu semper el a actua di forma corecto conforme ley. Awor cu e ta sospechoso den un caso penal, segun e portal a indica, el a sigura cu no ta algo facil pa asimila.

E ex minister plenipotenciario a indica cu aunke e no ta acusa Ministerio Publico como tal, el a expresa cu e



caso no ta cana manera debe ser y cu desde principio e caso no a cuminsa di bon manera.

El a splica, como ehempel cu e persona cu tabata representa Aruba na Bruselas, ken tabatin un oficina den Arubahuis pa practicalidad, y ta esun cu a bati alarma tocante supuesto irregularidadnan den, no tabata e persona indica pa haci esaki.

El a sigura un biaha cu e no ta culpa Ministerio Publico pasobra ora cu e caso a yega cerca nan, ya e no tabata corecto y tabata influencia. El a indica cu su caso t a basa riba e aspecto tecnico di presupuesto, pero ta su so ta para den corte siendo cu esnan cu a tuma decisionnan y a aproba e presupuesto, y esnan complementario no ta para banda di dje, refiriendo na esnan encarga cu e maneho

di presupuesto y presonan clave cu tabata involucra den e e proceso door di cual e ta e sospechoso principal den dje.

Pa e motibo ey Besaril a solicita testigonan cu por clarifica detayenan cu ta importante den e caso.

Pa loke ta e desigualdad cu segun Besaril, tin den e tratamiento di su caso, portal di noticia a indica cu e sospechoso a trece dilanti cu na cierto momento e minister di Rechtsbescherming di Hulanda a hay'e den un situacion igual na su esun cu e ta den dje aworaki, pero cu e minister Hulandes a ser trata diferente.

El a indica cu na Hulanda e minister a sinta full su periodo sin ningun problema ya yega na un acuerdo di pago via belasting. E mesun situacion a sucede cu e alcalde di Amsterdam, Femke Halsema, ken tambe a logra yega na un acuerdo di pago cu belasting y te cu dia di awe ta fungi como alcalde.

Besaril a remarca cu den ambos caso ta trata di personanan cu a abusa of no a mancha e propiedad y placa di na pais di un manera corecto, pero toch a haya trato diferente compara na su persona.

Na Hulanda e personanan aki a sinta, of ta sinta ainda, ainda sin problema, a yega na acuerdo pa paga bek y a haya e oportunidad pa coregi nan error. Contrario na esaki su persona a ser cera den KIA durante 24 dia, na momento cu e caso a cuminsa.

Pa e motibo aki el a expresa cu nan ta tratando e diferente, siendo cu ta trata di e mesun Reino Hulandes y mester traha conforme e asina yama gelijksheidsbeginsel.

Por ultimo, e noticiero a informa cu Besaril a sigura cu ora cu e caso ser trata integralmente den corte, e ta bay tin e oportunidad pa demostra cu e acusacionnan den su contra no ta corecto y cu el actua segun ley of recomendacionnan cu el a ricibi.

Investigacion Tulipan ta dirigi riba irregularidadnan na Arubahuis den e periodo di 2018 te 2021.

Segun loke ta conoci di e investigacion, mientras cu e so-

spechoso tabata den su funcion como minister Plenipotenciario na Hulanda, den poco palabra "el a haci fiesta cu credit card" y a hasta el a huur un propiedad na Hulanda unda a drecha hardin y cura di e cas, a pone un sistema di alarma pa 10.900 euro y a haci reparacionnan den e mesun cas na un costo di 21.000 euro na aña 2020. Esaki segun rapport di Centraal Accountantsdienst di Aruba (CAD) cu a presenta na Parlamento di Aruba den un reunion publico dia 13 di december 2022 door di Sr. Roland Pang di CAD, ken a informa e parlamentari- onan y pueblo di Aruba con e investigacion a bay, unda nan a investiga 18 luna so pa motibo di aplicacion di e banco ABN Ambro, algo cu a wordo cuestiona pa un parlamentario riba e hecho cu nan no tabata warda informacion di e cuenta di banco of pakico no a wordo pidi esey for di archivo.

Den esaki, tambe a bira conoci cu el a haci un biahe pa bin Aruba cu no a wordo aproba pa Consejo di Minister na december di 2020, unda el a paga na hotel Divi Village 1.300 euro. Tambe su yiu cu a caba di nace a wordo beneficia cu placa di pueblo di Aruba, ora el a drecha ful e camber di e integrante nobo di e famia. Su casa tambe a biaha riba VIP business class na momento cu Aruba tabata pasando un mal momento debi na pandemia di Covid-19. Esaki ta algun ehemplo chikito di hopi gasto cu e ex-minister a haci.

Pa dia 31 di october 2023 Ministerio Publico a confirma na Bon Dia Aruba cu keho penal a ser entrega contra e ex-minister pa malversacion di placa di pais Aruba den e caso.

Den luna di october 2023 tambe Corte di Husticia a dicta sentencia den e caso di e ex-minister plenipotenciario ken a ser acusa di no cumpli cu su deber y por lo tanto mester a retira for di su funcion den Cuerpo Policial di Aruba.

E sentencia aki a indica cu e motibo di retiro disciplinario ta basa cu Besaril a comete un infraccion grave di loke tabata su deber y for di su actuacion a surgi dudanan di loke ta trata su integridad.

CARIBBEAN SPEED PRINTERS N.V.

BONDIA **ARUBA** **TODAY**

TA ANUNCIA

Relaciona cu celebracion di
dia di Himno y Bandera

Ta participa cu **NO** lo tin edicion regular di
Bon Dia y Aruba Today riba **diamars**
18 di maart, 2025.

Pa e motibo aki ta haci un suplica na tur
esunnan cu ta desea di publica aviso den Bon
Dia y Aruba Today pa diaranson 19 di maart pa
por favor email: aviso@bondia.com

Gerencia

One happy island